

Date – 02/02/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Prime Minister Narendra Modia chuan Union Budget chu mihringte lam awn leh India in insiamthatna kawng a zawh mekah a bulthut ti nghet tu leh kawng sialtu anih thu a sawi.
2. Union Finance Minister Nirmala Sitharamani chuan kum 2026-27 ah hian fiscal deficit chu GDP atanga zaa 4.3 a nih tur thu sawiin kum hmasaa zaa 4.4 aain a tlem a ti bawk.
3. Tangka kum tharah central sorkar atanga Mizoram sum hmuh tur zaa 23.9 a pung tura chhut a ni.
4. Nikum chawhnu lama Lai Autonomous District Council hnuaiia muster roll lak zawng zawngte chu nimin atang khan chawlhtir vek tura tih a ni.

<><><>

UNION BUDGET

Prime Minister Narendra Modia chuan Union Budget chu mihringte lam awn leh India in insiamthatna kawng a zawh mekah a bulthut ti nghet tu leh kawng sialtu anih thu a sawi. PM Modia chuan nimina Union Budget pharh tak chu chhinchhiah tlak atih thu sawiin ram than zelna tur leh hun rei zawka hmasawna turah a nawrkaltu pawimawh tak a ni a ti a. Pu Modia chuan budget-a rawtna awmte chuan ram sum dinhmun a tha zawngin a ti che ang a, mipuite dinhmun a chawikan bakah thalaite tan remchanna thar a siam dawn a ni a ti.

Puan tawh angin Union Finance Minister Nirmala Sitharaman-i chuan nimin khan Union Budget 2026-27 chu Lok Sabha ah a pharh a. Pi Sitharamani chuan a budget pharh chu Thalaite tha chakna in a kaihhruai anih thu a sawi a. Mawhphurhna chi thuma innghat anih thu sawiin ram eibar zawna ti thangzel turte, mipuite tana thiam leh theihna siamsak a, an mamawh bungrua leh tul dang pekte leh chhungkua, hnam, sakhua, hmun hrang hranga awmte leh eizawna chi dang dang khawih mekte tana remchanna thar siam an nih thu a sawi a.

Pi Sitharamani chuan damdawi siamchhuah lam hmasawna turin Biopharma SHAKTI an ruahman thu sawiin hemi atan hian cheng vaibelchhe sing 1 dah a ni a, kum 5 chhungin India chu Biopharma hmunpuiah siam an tum a ti.

Budget-ah hian khadi, handloom leh handicraft tihchakna tur Mahatma Gandhi Gram Swaraj kalpuina turte, Textile Sector tana National Fibre Scheme leh National Handloom & Handicraft te thuikhawmtu tur, Integrated Programme hnuai Mega Textile Park din tura rawtna te a tel a, National Institute of Pharmaceutical Education & Research thar 3 dinna tur leh institute awm sa 7 thuam thatna tur a tel bawk.

Budget tharah hian cancer natna veite enkawlina damdawi chi hrang hrang 17-ah chhiah tih bo a ni a, ramdang atanga damdawia inenkawl duhte an pun chhoh theih nan Regional Medical Hub 5 din a ni dawn a, All India Institutes of Ayurveda thar 3 din tum a ni bawk. Arunachal Pradesh, Sikkim, Assam, Manipur, Mizoram leh Tripura-ah Buddhist Circuit tihhmasawna tur scheme kalpui tum a ni a, Tezpur leh Ranchi-a rilru lama harsatna neite enkawlina hmun, National Mental Health Institute- te chu Regional Apex Institution dinhmuna hlangkai turin thuam that tum a ni bawk.

Pi Sitharamani chuan kum 2026-27 ah hian fiscal deficit chu GDP atanga zaa 4.3 a nih tur thu sawiin kum hmasaa zaa 4.4 aiin a tlem a ti bawk. National Statistics Office in a chhutna hamsaah chuan ram sum dehchhuah GDP chu kum 2025-26 ah zaa 7.4 turin a chhut tih a sawi a. Nominal GDP hi zaa 8 turin a tarlang a ti bawk.



UNION BUDGET FOR MIZORAM

Tangka kum tharah central sorkar atanga Mizoram sum hmuh tur zaa 23.9 a pung tura chhut a ni.

Nimina Union Finance Minister Nirmala Sitharaman-i'n Union Budget a pharh takah chuan tun tangka kum kal lai (2025-2026) a Mizoramin sum a hmuh atanga chhuta tun tangka kum thar tur (2026-2027)-a central sorkar atanga sum a hmuh tur chu za zela 23 point 59 a pung tura chhut a ni a. Hei hi Finance Commission 16-na-in central sorkar leh state sorkar sum insem dan tura state-te'n za zela 41 an chan tur anga chhut a ni.

Mizoram hian central sorkarin chhiah chi hrang hrang atanga sum a dawn chu tun tangka kum kal lai-ah hian cheng vaibelchhe 6,964 leh nuai 85 a ni a. Finance Minister thusawi atanga a lan dan chuan tangka kum tharah hian Mizoram chuan cheng vaibelchhe 8,608 leh nuai 8 dawng tura chhut a ni a, a punna hi cheng vaibelchhe 1,643 leh nuai 23 ni tura ngaih a ni. Hei hian tun thla a Finance changtu Chief Minister Pu Lalduhoma'n assembly a a pharh tur tangka kum thara Mizoram budget pawh a tha zawnga nghawng lian tham a neih beisei a ni.

Hemi chungchang ah hian Economics lam mithiam Pu Huna Kawlvawm chuan Mizoram Sorkar tan thil tha tak a rawn thlen ngei dawn tih a chiang, a ti a,

Mizoram tana chhinchhiah tlak tak Union Tax and Duties, India ram pumpui chhiah khawn-ah 15th Finance Commission in 0.500 a pek thin chu 16th Finance Commission -ah hian 0.564 in Mizoram chanvo a rawn tipung ta a, hmarchhak State zingah Mizoram leh Assam chiah hi 15th Finance Commission aia 16th-ah Central-a chhiah tlingkhawm chang tam tur zingah an tel tih a sawi a ni.

<><><>

ASSEMBLY SESSION

Tun thla ni 17 atanga tan tur Assembly inkhawm atan bill a la lut lova House chhunga lehkha pharh tur 2 leh zawhna engemawzat a lut tawh.

Assembly Secretariat atanga thu dawn danin zawhna hi House chhunga chhan chi (starred question) 445 a lut tawh a, ziaka chhan chi (unstarred question) 193 a lut tawh bawk a. House dawhkana sorkar lehkha pawimawh dah (laying of papers) tur 2 lut tawhin sorkar atangin dan thar emaw dan dinglai siamthat tur emaw lut a la awm lo. Assembly Budget Session lo awm tur hun hman dan tur duangtu tur Speaker Pu Lalbiakzama hova Business Advisory Committee (BAC) hi January ni 28 khan thukhawm tura ruahman a ni na-in member, legislature party hruaitu hrang hrangte Aizawl a an awm remchan loh avangin an thu thei ta lova. Chuvangin BAC thukhawm hun tur hi tunkar Ningani (February ni 5) ruahman leh a ni.

Assembly inkhawmah chuan budget session hian hun a duh rei ber ziah a, tihtur pangngai bakah a tlangpui a budget sawihona (general discussion on the budget) bakah Minister-te'n an department chanpual a sum hman tur sawiho (demand-wise discussion) a awm bawk avang a ni a. Sorkar bill a tam leh tlemin a rei zawng tur a hril thui hle bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

LADC AUSTERITY MEASURES

Nikum chawhnu lama Lai Autonomous District Council (LADC) hnuai a muster roll lak zawng zawngte chu nimin atang khan chawlhtir vek tura tih a ni.

LADC a sum leh pai dinhmun vawnga viltu 'Finance Department' in a zirchianna leh a rawtna angin LADC ah sum dehchhuah (Revenue inflow) leh senral inbuk tawklo avangin kawng hrang hrangin inremchen a tul thu tarlan a ni a. He mi vang hian nikum September ni 1 atanga December ni 11 inkara Muster Roll a hna lak zawng zawngte chu, nimin February ni 1 atang khan chawlhtir vek an nih tur thu

LADC Executive Secretary thupek chuan a tarlang. Tun tum LADC inkhawmah khan sorkarna chelh hlim leh eptu lam hruaituten inrenchem pawimawhzia leh council inrelbawlina atana sum hmuh belh pawimawhzia uar takin an sawi chhuak hlawm a. Tun dinhmunah hian council hnuai a hnathawk hi an tam hle tihte sawi chhuakin hnathawkte hlawh atan sum a kal tam avangin hmasawwna hnathawhna tur sum a awm mang lo an ti a. Sorkar din thar chuan huai taka thutlukna a siam ngam a tul an tih thu an sawi bawk a ni.

Autonomous district council 3-ah te hian council hnuai a thawk leh council budget atanga hlawh la hi an tam hle ni a sawi a ni a. Rorellai party-in vote zawwna leh insawhnghehna atan an hmang thin ni a puh an ni bawk. Thenkhat sawi dan chuan council hnuai a hnathawkte hian pisa kai kim se thutna an nei lovang tih an ti hial a. Council sum ei hektu ber niin council thenkhatah chuan budget pumpui za zela 90 chuang zet hlawh atana sen nih thu an sawi a ni.

<><><>

HERITAGE VISITORS

Ziaka chhinchhiah theih chinah Champhai District-a Dungtlang khaw daia Lianchhiari Lunglen tlang leh a kianga Pi pu te hmun hlui te chu kum kalta, 2025 chhung khan mi 13,710-in an tlawh a, hetah hian Pathianni a tlawhtute an tel lo.

Dungtlang Lal fanu Lianchhiari Lunglen Tlang tlawhtu tam zawk chuan a kianga Zokhua, Lianchhiari Puan tahna, Lianchhiari Thlan leh Pasaltha Lalhminglana Lungphunte, Thangchhuah Mual leh Dungtlang Sangsarih hmun hluite hi an tlawh nghal thin a ni.

Luh man hi hi mi pakhat ah Rs 20/-, Two Wheeler Rs 10/-, Car Rs 30/-, Bus Rs 50/- an laksak thin a, luh man hi kum 2023 atang khan an la tan a ni.

<><><>

MIZO JEWS

Mizo Juda ti a sawi, Bnei Menashe ti a invuah mi 300 vel chu tun thla chhung hian Israel rama pem thla turin an inbuatsaih mek.

Aizawl a Bnei Menashe hruaitute'n an sawi danin Mizoram leh Manipur atangin mi 300 ve ve chu Israel-a pem thla turin an inpuahchah mek a, tun thla chawhnu lamah chuan India an chhuahsan thei turah an inngai. Ram Thianghlim a pem thla turte hi nikum December thla bul lam khan thlan an ni a, tunge pem tur tih chiah erawh chu hriat a la ni lova. Pem thei turte thlan tur hian Juda Rabbi 9 tiamin Jewish Agency for Israel mite leh Delhi a Israel Embassy atangin mi 35 vel Aizawlah ni 10 chhung an rawn cham a, pem thlak duhte chu an hma-ah hian an inlan a ni. Bnei Menashe hruaitute chuan pem thla tura thlan turte chu Bnei Menashe member a inziaklut, mipa an nih chuan serh tan tawh leh Juda sakhua a inlet tawh an nih bakah Juda sakhaw serh leh sang an hriat thuk zawngte nen enfiah an ni a. Israel an thlen thlak tirh atanga chhuta thla 6 nung Passport neih a ngaih bakah Kristian an lo la ni ru reng em tihte pawh chik taka zir chian a ni a. Mizo Juda nihna a Israel rama lo pem tawh chhungte chu duhsak bik an nih tur thu an sawi bawk a ni.

Israel sorkar chuan tun hnai khan India ram hmarchhak, Mizoram leh Manipur a Mizo Juda mite, an rama pem thla duh mi 6,000 thelh chu kum 2030 ral hma a pem thlak a phalsak a. A tahtawla an pem thlakna turah tun thla hian a hlawm hmasa ber, mi 300 ve ve chu Mizoram leh Manipur atanga chhuk tura ruahmanna siam a ni a. Kal tur thlan chhuahte hi Rabbi-te hian an rawn puan thuai rin a nih thu Bnei Menashe hruaitu Jeremiah L. Hnamte chuan Akashvani Aizawl News a hrilh.

Mizo Judate hi tam tham tak Mizoram leh Manipur atangin an lo pem thla tawh a, kum 2005 a Isarel rama Juda puthiam lal zing ami Sephardi Chief Rabbi Shlomo Amar-in India hmarchhaka Israel hnam bo ni a inhriate Juda mi a a pawm atang khan pem thla an tam zual ta a ni.



BIOMETRTIC ENROLMENT

Mizorama Myanmar raltlante kutze thla leh mitnaute hmanga chhinchhiahna hna thawh mek chu kar kalta chhung khan raltlan luh belh vangin hmasawna a awm lo.

Home department atanga Akashvani Aizawl News-in thu a dawn danin Champhai leh Hnahthial district-ah raltlan an luh belh avangin raltlan hi 237 in an pung chho a. He mi avang hian Myanmar raltlan chhinchhiah zat hi za zela 89 point 94 atangin za zela 89 point 79-ah a tla thla zawk a. District dangah he hna thawhna-ah hian kar kalta chhung khan hmasawna a awm lo a ni. Kar hmasa hmasa lehah khan Myanmar raltlan hi 28,964 an awm a, kar kalta Zirtawpni khan mi 29,201-ah an pung chho a. Champhai district-ah raltlan 231 luh belhin Hnahthial district-ah mi 6 an rawn luh belh bawk a ni. He tiang a nih avang hian Champhai district-a raltlan awmte biometric enrolment zawh vek tawh anga puan chu za zela 99 point 82-ah a tla thla leh ta a. Mizoram puma biometric enrolment tihfel tawh zat pawhin a tlakhniam phah ta a ni.

Biometric enrolment zo fel vek tawh district 4 awm kha kar kalta kha chuan district pathumah a tla thla leh a. La zo fel lo district dangte'n hma an sawn miah bawk lo niin home department atanga thudawn chuan a sawi a ni.



WAR AGAINST DRUGS

Central YMA President Pu R. Lalngheta'n Aizawl khawpui chu Zone 10-ah thenin ruihhlo do beihpui thlak a ni dawn tih a sawi.

He thu hi Tlangnuam Branch YMA Ruihhlo Do kum puan hawna-ah sawiin, Branch tina kumpuan te pawh do hneh ngei a nih theih na'n kut a fai tur a ni a, Pathian malsawm tlaka fimkhur taka thawh a tul takzet a, kohhran tinin ruihhlo a rem theih nan bang lova tawngtai theuh turin a ngen a ni. Mahni khawtlanga ruihhlo la ti lo te chu fuih sauh sauh a, a ti tawh te'n ngei an harsatzia an chiang a, a ti lo te hi an rilru hneh turin tan lak a tul tak meuh meuh tih a sawi bawk. CYMA President chuan tunhmain Proxyvon a hluar a, hruaitu hmasate'n theihtawp chhuahin an do a,

hnehin a awm tawh a. Hun a lo kal zel a, heroin chu mi hausa faten an ching a, a lar zual leh a. Tunah chuan rampumah a lo darh ta a, nu leh pa tirumtu, chhungkua tichhe tu, mirethei fate thlengin an 'addict' ta zel chu a rapthlak lutuk a, beng sika thapui thawha hma lak a ÷ul tawh takzet tiin YMA member kalkhawm te chu tihtakzeta ruihhlo do kawnga ÷an la thar leh turin a fuih a ni.

